



HALI BA DAME [HABADA]

Monitorizasaun no Advokasia ba Seguransa Komunitária

RELATÓRIU MONITORIZASAUN SEGURANSA KONA-BA JOGUS ONLINE NO SCAM CALL CENTER IHA TIMOR-LESTE

Períodu Monitorizasaun: 26 Juñu – 19 Jullu 2026

Rua Tali Laran 1, Comoro, Dom Aleixo, Dili | www.habada.org
abelamaral75@gmail.com | +670 7745 4324

Data: 21 Jullu 2026

1. Introdusaun

Jogus online no scam call center refere ba operasaun kriminozu organizadu sira ne'ebé uza edificiu privadu sira - dala barak aluga rezidénsia ka armajen sira – hodi hala'o fraude online, jogu ilegal no fraude sibernetiku hasoru vítima sira iha rejiaun no iha mundu tomak. Modelu kriminozu ida-ne'e bolu atensaun internasional bo'ot iha tinan hirak ikus ne'e hafoin aumenta maka'as iha Kamboja, Myanmar no Filipina, iha ne'ebé Nasoins Unidas no organizasaun sira direitus umanus nian dokumenta ona ligasaun forte sira ho tráfiku umanu, servisu forsadu no violasaun direitu fundamental sira hasoru ema sira ne'ebé bosok hodi servisu iha rede sira-ne'e nia laran.

Timor-Leste ho fronteira rai no marítima estratéjiku, no kapasidade supervizaun ekonómiku-financeiru ne'ebé sei limitadu, agora mosu hanesan destinu foun ida ba rede sira-ne'e atu estabelese operasaun sira. Iha fulan Agustu 2025 Polícia Científica de Investigação Criminal (PCIC) desmantela sentru fraude online iha Oecusse no depois Governu halo kanselamentu ba lisensa operasaun jogus no apostas online iha fulan Outubru 2025 liuhusi Rezolusaun Governu n.º 54/2026. Ikus mai PNTL no PCIC halo mós operasaun bo'ot iha kapital Dili hodi desmantela atividade sira jogos online no scam call center. Maske nune'e, entre 26 Juñu no 19 Jullu 2026 de'it — período ida iha de'it semana tolu nia laran — instituisaun seguransa sira deskobre no desmantela jogus online no scam call center sanulu resin-rua (12) iha munisípiu Liquiça no Dili. Padraun ida-ne'e la'ós insidente izoladu ida. Frekuénsia operasaun nian (maizumenus kada loron rua to'o tolu), diversidade lokalizasaun nian (husi Liquiça to'o Aileu no bairru oioin iha Dili), no eskala kazu ida-idak nian (husi ema na'in 2 to'o 99) hatudu katak rede ida ne'ebé funsiona ho estrutura, finansiamentu no koordinasaun lojística ne'ebé signifikativu.

Komparasaun ho esperiénsia rejional esensial atu komprende eskala problema ida-ne'e nian. Iha Kamboja no Myanmar, operasaun sira scam call center nian aumenta husi atividade ho eskala ki'ik ba indústria ida ho osan biliaun barak iha tinan lima to'o hitu nia laran, no governu rejional sira rekoñese ona katak dezafiu sentral ida maka koordinasaun fraku entre ajénsia estadu nian no kapasidade limitadu atu investiga rede financeira kompleksu sira ne'ebé hale'u nasaun oioin. Timor-Leste, ho populasaun ne'ebé ki'ik no rekursu institusional ne'ebé limitadu, provavelmente hasoru dezafiu ne'ebé hanesan, no ho kapasidade resposta ne'ebé ki'ik liu. Ida-ne'e reforsa argumentu katak Timor-Leste nia resposta presiza prevensaun sedu, la'ós reasaun de'it bainhira kazu bo'ot sira fó sai ona ba públiku.

Relatóriu ida-ne'e bazeia ba kompilasaun no análise relatóriu operacional PNTL no PCIC nian ne'ebé fó sai ba públiku durante período 26 Juñu to'o 19 Jullu 2026. HABADA halibur informasaun kona-ba data, fatin, instituisaun responsavel, nasionalidade ba suspeitu sira, número ema ne'ebé detein, no ekipamentu ne'ebé hetan aprensaun iha operasaun ida-idak, hafoin hala'o análise komparativu ida hodi identifika padraun jeral, tendénsia no lakuna instituisaun sira. Relatóriu ida-ne'e la inklui verifikasaun terrenu independente tanba limitasaun asesu; tanba ne'e informasaun sira ne'e foti husi fonte ofisial PNTL, PCIC, mídia no organizasaun internasional sira.

2. Sumáriu kona-ba Kazu Operasional sira (Juñu – Jullu 2026)


Tabela tuir mai ne'e hatudu operasaun sia (13) ne'ebé PNTL no PCIC hala'o durante periodu monitorizasaun:

Tabela 1: Operasaun sanulu resin-tolu (13) ne'ebé PNTL, PCIC no Servisu Migrasaun hala'o durante periodu monitorizasaun 26 Juñu - 19 Jullu 2026

Data	Lokalizasaun	Institusaun	Nasionalidade	Detensaun/Identifikasaun
26 Jun 2026	Tibar, Liquiçá	PNTL	Indonézia 54, Kamboja 7	61
4 Jul 2026	Aileu	PNTL Munisípiu Aileu	Xines	44
8 Jul 2026	Bebonuk, Dili	PCIC	Xines (98), Kamboja (1)	99
8 Jul 2026	Manleu, Dili	PNTL, Servisu Migrasaun	Xines 27, Kamboja 2	29
9 Jul 2026	Metiaut, Dili	PNTL	Xines	24
13 Jul 2026	Ulmera, Liquiçá	PNTL	Indonézia (75), Xines (1)	76
13 Jul 2026	Comoro, Dili	PNTL	Xines	14
14 Jul 2026	Fomento II, Dili	PCIC	Xines	28
14 Jul 2026	Maumeta, Liquiçá	PNTL Munisípiu Liquiçá	Xines	17
17 Jull 2026	Manleu City 8, Dili	PCIC	Xines	33
17 Jul 2026	Kulu-Hun, Dili	PCIC	Xines	19
18 Jul 2026	Bedois, Dili	PNTL, Servisu Migrasaun	Indonézia 6 no Xines 1	7
19 Jul 2026	Auhun, Dili	PNTL	Xines 1 no Japaun 1	2
Total				453

Fonte: Rezultadu monitorizasaun HABADA, 26 Juñu–19 Jullu 2026.

Figura 1: Total suspeitu sira tuir nia nasionalidade



Total jeral ema na'in 453 maka identifika ka detein iha de'it semana tolu nia laran. Xines na'in 44 ne'ebé identifika iha lora 4 Jullu 2026 iha Munisípiu Aileu ikus mai Servisu Migrasaun klarifika katak sira hotu iha dokumentu (pasaporte no vistu) kompletu no la iha indisiu envolve iha krime. Nune'e suspeitu 409 deit maka submete ba prosesu kriminal.

3. Padraun no Análize Tendénsia

3.1 Predominánsia husi sidadaun Xines sira

Husi kazu sira, sanulu resin ida envolve suspeitu sira ho nasionalidade xineza, no iha maioria husi kazu sira ne'e sidadaun xineza sira maka grupu bo'ot liu. Kazu Tibar no Ulmera (Liquiça) de'it maka sidadaun Indonézia sira maioria. Padraun ida-ne'e konsistente ho tendénsia rejional sira iha Sudeste Aziátiku, iha ne'ebé investigasaun internasional sira dokumenta ona envolvimentu husi rede krime organizadu Xines sira iha operasaun sira fraude nian iha Kamboja, Myanmar no Filipina. Prezensa maka'as husi sidadaun Xines sira iha kazu sira Timor-Leste nian hatudu katak rede sira-ne'e bele habelar ka muda operasaun sira ba fatin foun sira hafoin represaun sira ne'ebé maka'as iha fatin sira seluk iha rejiaun.

3.2 Distribuisaun jeográfika

Operasaun sira la'ós de'it iha kapital, Díli, maibé espalla mós ba munisípiu Liquiça (kazu tolu). Iha Díli laran rasik, kazu akontese iha bairru oioin — Bebonuk, Manleu, Metiaut, Comoro, Fomento II, Kuluhun, Bedois, Auhun no Manleu City 8 — ne'ebé hatudu katak operasaun sira la konsentra iha área ida de'it maibé namkari iha fatin oioin iha kapital tomak. Distribuisaun ida-ne'e aumenta dezafiu ba PNTL no PCIC atu hala'o ezekusaun ne'ebé efetivu, presiza rekursu no koordenasun ne'ebé bo'ot liutan.

3.3 Uza rezidénsia no armazén sira

Operasaun sira uza estrutura fíziku sira ne'ebé hatudu hanesan uma ka armazén baibain ida — armazén ida (Bebonuk), rezidénsia privadu alugadu sira (Manleu, Metiaut, Aileu, Maumeta) no otél ida (Manleu City 8 no Auhun). Kazu Metiaut nian partikularmente notavel: PNTL deskobre kama 43 ne'ebé instala iha uma andar rua nia laran, ne'ebé indika katak fatin ne'e mós serve hanesan dormitóriu ba traballador sira, konsistente ho padraun rejional sira iha ne'ebé vítima tráfiku umanu sira hetan konfinamentu no obrigadu atu servisu iha kondisaun restritivu sira.

3.4 Eskala no ekipamentu

Apreensaun ba ekipamentu sira – komputador 88 no laptop 13 iha Bebonuk - indika eskala operacional ne'ebé signifikativu, ne'ebé bele hatudu investimentu finanseiru substansial husi rede krime organizadu iha operasaun fraude ne'e nia kotuk. Eskala ida ho tipu ida-ne'ebé la'ós grupu ki'ik ka ator individual sira maka finansia; presiza kapital, lojística no rede internasional sira atu estabelese.

3.5 Eskalasaun lalais iha períodu ne'ebé badak

Ezamina kronolojia kazu sira-ne'e nian revela padraun ida ne'ebé preokupante: entre 26 Juñu no 19 Jullu (semana tolu deit nia laran), númeru operasaun sira aumenta husi ida kada semana ba tolu ka haat iha semana ikus ne'e. Iha semana ikus nian de'it (13–14 Jullu), PNTL no PCIC hala'o operasaun haat iha loron rua nia laran, ne'ebé envolve total suspeitu 135. Aselersaun ne'e bele refleto possibilidade rua: (a) intensifikadu esforsu ezekusaun husi instituisaun seguransa hafoin deskobre kazu inisial sira, ka (b) espansaun ativu husi rede krime organizadu sira iha territóriu tomak, hodi loke fatin foun sira lalais molok

deskobre husi polísia. Iha prátika, buat rua ne'e bele akontese hamutuk: desmantelamentu husi fatin ida-idak bele obriga rede atu muda operasaun sira ba fatin foun sira, hodi kria “efeitu balaun” ne'ebé komún iha aplikasaun krime organizadu nian iha nivel mundial. Se ida-ne'e loos, signifika katak aprosimasaun aplikasaun reativa de'it — sei la sufisiente; presiza estratéjia prevensaun ida ne'ebé alvu ba rede nia estrutura finanseira no lideransa atu interope atividade sira-ne'e ho efetivu.

4. Implikasaun ba Seguransa Nasional no Governasaun

4.1 Risku ba krime organizadu internasional

Prezensa operasaun sentru fraude nian ho eskala ne'ebé deskobre durante períodu badak ne'e hatudu katak Timor-Leste sai parte ida husi rede krime organizadu transnacional ida ne'ebé bo'ot liu, la'ós de'it esperiênsia insidente lokal izoladu sira. Ida-ne'e hatudu ba nesesidade urjente ba Timor-Leste atu hametin kooperasaun ho INTERPOL, parseiru bilateral sira, no organizasaun rejional sira hanesan ASEAN hodi fahe informasaun no desmantela rede sira-ne'e.

4.2 Risku ba tráfico umanu

Detallu sira hanesan “kama 43 ne'ebé instala iha uma andar rua” (Metiaut) no detensaun sira ho eskala bo'ot (99 iha Bebonuk, 76 iha Ulmera) hamosu preokupasaun maka'as katak individuu balun ne'ebé envolve karik la'ós autor maibé potênsia hanesan vítima husi tráfico umanu ne'ebé hetan obriga ka bosok atu servisu. HABADA rekomenda katak investigasaun sira presiza distinge ho klaru entre organizador/líder sira rede nian no vítima potensial sira ne'ebé mós presiza protesau, la'ós deportasaun de'it.

4.3 Integridade sistema fronteira no vistu nian

Faktu katak sidadaun estranjeiru sira bele tama iha Timor-Leste ho número bo'ot (liu 90 dala-ida) no la deteta durante períodu signifikativu hatudu frakeza sériu iha sistema kontrolu fronteira no vistu. Ida-ne'e presiza revizaun urjente ida kona-ba oinsa ema estranjeiru sira hetan vistu, tama iha nasaun, no konsege estabelese operasaun sira ho eskala bo'ot hanesan armazen no rezidência sira laho deteksaun iha períodu sira ne'ebé naruk.

4.4 Implikasaun diplomátika no ekonómika sira

Eskala husi kazu sira-ne'e mós lori implikasaun diplomátiku sira, partikularmente ho Repúblika Popular Xina no Repúblika Indonézia, ne'ebé nia sidadaun sira maka maioria envolve iha kazu sira-ne'e. Governu Xina no Indonézia, hanesan mós governu sira seluk iha rejiaun ne'e, hatudu ona interesse maka'as hodi kombate atividade jogus online no scam call center ne'ebé afeta ninia sidadaun sira, nune'e kooperasaun bilateral bele sai oportunidade importante ida ba Timor-Leste hodi hametin relasaun diplomátika no hetan asistênsia téknika. Iha tempu hanesan, karik kazu sira ne'e kontinua aumenta laho kontrolu ne'ebé efetivu, ida ne'e bele estraga Timor-Leste nia reputasaun nu'udar destinu seguru ba investimentu no turizmu, no bele afeta esforsu governu nian atu atrai investimentu estranjeiru ne'ebé lejítimu. Setor privadu no comunidade empresarial sira mós ezije atensaun, tanba armajen no rezidência sira ne'ebé

aluga ba operasaun ilegal sira, bele envolve na'in ba propriedade sira, hatene ka lae, fasilita atividade krime organizadu liuhusi akordu arrendamentu.

5. Kontestu Rejional no Internasional

Seksaun ida-ne'e situa deskobrimentu sira Juñu-Jullu 2026 nian iha kontestu luan liu husi relatóriu ONU, ajénsia rejional no relatóriu mídia nian ne'ebé públika entre 2025 no 2026, ne'ebé independentemente haforsa tendénsia husi espansaun sentru fraude iha Timor-Leste no iha rejiaun.

5.1 UNODC alerta espesifiku ba Timor-Leste

Iha Setembru 2025, Gabinete ONU nian ba Droga no Krime (UNODC) fó sai Alerta Ameasa Krime Organizadu rejional ida hodi fó avizu katak rede krime organizadu transnacional sira infiltra iha Rejiaun Administrativa Espesial Timor-Leste nian Oecusse-Ambeno (RAEOA) liuhusi investimentu estranjeiru diretu kriminozu (criminal FDI), hafoin operasaun polísia nian iha otel iha rejiaun no hetan kartaun SIM no dispozitivu internet satélite Starlink — ekipamentu ne'ebé UNODC identifika hanesan indikador ida ba atividade sentru fraude nian. UNODC liga rede ne'e ba entidade sira ne'ebé asosiadu ho kriminozu sibernétiku sira ne'ebé hetan kondensasaun, operador jogu offshore no grupu sira ne'ebé iha afiliasaun ba triada, no fó avizu katak buat ne'ebé observa hela iha Timor-Leste hanesan lolos ho faze dahuluk sira krize sentru fraude nian ne'ebé antes ne'e hale'u nasaun sira iha Mekong no Filipina.

Alerta estudu kazu UNODC nian tuirmai fó sai oinsa rede ida ne'ebé liga ba 14K Triad buka atu uza empreza sira jogu no teknolojia nian — inklui empreza ida ne'ebé nomeia atu jere projetu ID dijital nasional Timor-Leste nian — hodi inkorpora infraestrutura ilísitu iha kuadru zona komérsiu livre nasaun nian. Tuir alerta, Parlamentu Nasional Timor-Leste nian husu atu suspende no revoga lisensa sira ba jogu online iha nasaun tomak, ho razaun risku sira ba seguransa nasional, estabilidade sosial no reputasaun internasional.

5.2 Investigasaun sira husi mídia

Al Jazeera fó sai iha Setembru 2025 katak operasaun polísia nian iha otel Oecusse fó sai evidénsia sira ne'ebé konsistente ho operasaun sira sentru fraude nian no maizumenus traballador na'in 30 husi Indonézia, Malázia no Xina hetan kapturasaun, UNODC hato'o katak seidauk klaru sira hanesan vítima tráfik u manu ka elementu ne'ebé envolve. The Organized Crime and Corruption Reporting Project (OCCRP), iha investigasaun konjunta ida ho Guardian Austrália, hetan katak individuu sira ne'ebé uluk hetan sansaun husi Estados Unidos tanba ligasaun alegadu ho Prince Group ne'ebé baze iha Kamboja — ne'ebé deskreve hanesan sindikatu ida husi sindikatu fraude sibernétiku alegadu bo'ot liu iha mundu — iha ona ligasaun ho projetu resort kriptomoeda nian ho Timor-Leste. OCCRP mós relata katak Timor-Leste nia ekonomia dolarizadu, bazeia ba osan cash, fronteira sira ne'ebé la metin no polísia ne'ebé rekursu limitadu, sai atrativu estruturalmente ba rede sira ne'ebé hanesan opera iha Kamboja.

Reportajen lokal husi HATUTAN no TATOLI (mídia nasional Timor-Leste nian) dokumenta operasaun sira ne'ebé refere iha relatóriu ida-ne'e, inklui operasaun 26 Juñu iha Tibar, Liquiçá, no prosesu judisial sira tuirmai iha Dili, iha ne'ebé Prokurador sira buka kausaun no medida restrisaun-viajen hasoru arguidu sira

tanba akuzasaun fraude informátika, asosiasaun kriminal no jogu ilegal. Kobertura internasional iha fulan-Jullu nia klaran tinan 2026 (ABC Austrália no mídia sira seluk) fó sai katak polísia Timor-Leste nian, kaer ona ema Xinés, Indonézia no Kamboja liu 300 iha operasaun sira iha Dili ne'ebé sita iha relatóriu ida-ne'e.

5.3 Relatóriu Direitus Umanus ONU nian kona-ba krize rejional ne'ebé luan liu

Iha Maiu 2025, Relator na'in tolu ONU nian — relata kona-ba forma kontemporánea sira eskravidaun nian, tráfik u ba ema, no situasaun direitus umanus nian iha Kamboja. Fó sai deklarasaun conjunta ida hodi fó avizu katak kriminalidade forsada iha sentru fraude nian iha Sudeste Aziátiku atinji ona nivel krize umanitária no direitus umanus nian, hanesan tortura, violénsia extrema, no detensaun arbitrária ne'ebé afeta traballador sira rihun ba rihun nu'udar vítima ba tráfik u manu iha Kamboja, Myanmar, Laos, Filipina no Malázia.

Iha Feveireiru 2026, Gabinete Komisáriu Alto ONU nian ba Direitus Umanus (OHCHR) públika relatóriu kompletu ida, “A Wicked Problem”, bazeia ba entrevista sira ne'ebé informadu kona-ba trauma ho sobrevivente sira husi Bangladexe, Xina, Índia, Myanmar, Sri Lanka, África-Súl, Tailândia, Vietname no Zimbabué. Relatóriu ne'e hetan katak to'o Marsu 2025, vítima sira husi pelumenu nasaun 66 hetan ona tráfik u manu iha sentru fraude online sira, ho estimativa kredível pelumenu ema 300,000 ne'ebé servisu iha operasaun sira hanesan ne'e iha Sudeste Aziátiku no reseita anual global sira ne'ebé kalkula maizumenu dolar amerikanu biliaun 64. OHCHR dokumenta tortura sistemátiku, abuzu seksual, abortu forsadu, falta ai-han, konfinamentu obrigatóriu, no korrupsaun. Vítima sira deskreve ofisial fronteira sira ne'ebé koordena ho rekrutador sira no polísia ne'ebé simu pagamentu sira husi jestor sira sentru detensaun nian.

UNODC nia kampaña sensibilizasaun #TrappedInScamCrime iha Dezembru 2025, ne'ebé hala'o hamutuk ho Misaun Justisa Internasional no finansia husi Departamentu Estadu EUA nian, deskreve mós fenomenu hanesan esplorasau manu ho eskala industrial iha ne'ebé obriga vítima tráfik u sira bosok ema seluk enkuantu dalabarak hasoru mesak konsekuénsia legal sira envezde hetan protesaun.

5.4 Tanba saida maka ida-ne'e importante ba deskobrimentu sira HABADA nian?

Rejistu ONU no mídia nian estabelese pontu tolu ne'ebé diretamente relevante ba dadus kazu nian iha Seksaun 2–4 husi relatóriu ida-ne'e. Primeiru, perfil demográfiku husi suspeitu sira ne'ebé dokumenta husi HABADA — liuliu sidadaun Xines sira, ho sidadaun Indonézia sira ne'ebé forma maioria iha kazu rua Liquiçá nian — reflete padraun nasionalidade nian ne'ebé UNODC no OHCHR deskreve iha fatin seluk iha rejiaun. Segundu, infraestrutura fíziku ne'ebé identifika iha Timor-Leste (rezidénsia alugadu, armazén, otel, no kama ho estilu dormitóriu ba okupante sanulu resin) koresponde ho tipolojia kompleksu ne'ebé dokumenta husi OHCHR iha Kamboja, Myanmar no Laos, reforsa HABADA nia preokupasaun katak indíviduu detidu balun bele sai hanesan vítima tráfik u manu, envezde elementu ne'ebé envolve. Terseiru, alerta ameasa UNODC nian iha Setembru 2025 – ne'ebé fó sai besik tinan ida antes operasaun sira iha Juñu-Jullu 2026 ne'ebé dokumenta iha relatóriu ida-ne'e - hatudu katak ajénsia internasional sira marka ona Timor-Leste hanesan sentru emerjente ida molok eskala problema nian sai vizível ba públiku

liuhusi asaun polísia nian, hodi reforsa rekomendasaun HABADA nia kona-ba estratéjia orienta ba prevensaun duké reativa de'it.

6. Konkluzau no Rekomendasaun

Deskoberta operasaun jogo online no scam call center sanulu resin-rua iha períodu semana tolu nia laran hatudu katak Timor-Leste oras ne'e hasoru dezafiu foun no sériu iha ámbitu krime organizadu transnacional. Enkuantu esforsu sira PNTL no PCIC nian dismantela operasaun sira-ne'e merese hetan apoiu. HABADA sei kontinua akompaña dezvoltamentu sira iha kazu sira-ne'e, partikularmente prosesu judisial sira tuirmai. Ida-ne'e krusial la'ós de'it ba Timor-Leste nia seguransa nasional, maibé mós ba nasaun ne'e nia reputasaun internasional nu'udar estadu ida ne'ebé iha kapasidade atu kontrola nia teritóriu no proteje nia sidadaun sira no vizitante sira husi esplorasau rede krime organizadu.

Nune'e HABADA rekomenda:

Ba Governu

- Estabelese Taskforce Multi-Setorial ida ho mandatu ne'ebé klaru ka reforsa Komisaun Interministerial ba Seguransa atu koordena resposta entre PNTL, PCIC, Servisu Migrasaun, Servisu Intelijénsia, Ministériu Interior, Ministériu Turizmu no Ministériu Negósiu Estranjeiru hodi rezolve fenomenu jogos online no scam call center.
- Halo revizaun urjente ba polítika vistu no sistema kontrolu fronteira nian, partikularmente ba grupu vizitante bo'ot sira husi nasaun espesífiku sira.
- Hasa'e transparénsia públika kona-ba prosesu judisial sira tuirmai hasoru sidadaun estranjeiru sira ne'ebé hetan detensaun, inklui informasaun kona-ba akuzasaun formal sira no rezultadu kazu nian.

Ba PNTL no PCIC

- Hametin koordenaun entre komandu munisípiu sira no Servisu Migrasaun liuhusi protokolu formal urjente ida (SOP) ne'ebé garante resposta lalais bainhira de'it ema estranjeiru sira ne'ebé detidu presiza transferénsia.
- Investiga liutan ligasaun potensial sira entre kazu oioin hodi identifika se sira liga ba rede organizadu ida de'it ka rede independente oioin.
- Estabelese ekipa investigasaun espesializadu ida no envolve Komisaun Luta Anti-Tráfiku Umanu (KLATU) halo investigasaun ba kazu tráfiku umanu hodi identifika no proteje vítima potensial sira entre suspeitu sira.

Ba parseiru dezvoltamentu sira

- Apoia Timor-Leste ho kapasitasaun tékniku no rekursu sira atu investiga rede krime organizadu transnacional sira, partikularmente iha forense dijital no investigasaun finanseira.
- Koopera ho autoridade Xineza, Indonézia no Kamboja hodi garante bainhira halo deportasaun ne'ebé apropriadu ba nia sidadaun sira, ho respeito ba direitos umanus.

Bibliografia

Relatório operacional PNTL / PCIC no mídia lokal (Timor-Leste)

- PCIC, “Ema na'in lima-nulu resin rua detidu iha operasaun rua kontra sentru fraude online iha Dili,” 18 Jullu 2026. <https://pcic.gov.tl/tet/news/mais-de-meia-centena-de-detidos-em-duas-operacoes-contra-centros-de-fraude-onlin>
- PCIC, “PCIC kaer tan sidadaun estranjeiru na'in-28 ne'ebé suspeitu halo jogu online ilegal iha Fomentu II, Dili,” 14 Jullu 2026. <https://pcic.gov.tl/tet/news/pcic-detem-mais-28-cidadãos-estrangeiros-suspeitos-de-jogo-online-ilegal-em-fome>
- TATOLI, “PNTL 'sobu' scam call center iha Tibar no detein sidadaun estranjeiru na'in-61,” 26 Juñu 2026. <https://tatoli.tl/2026/06/26/pntl-sobu-scam-call-center-ih-tibar-no-detein-sidadaun-estranjeiru-nain-61/>
- TATOLI, “Kazu scam call center: Tribunál aplika TIR no kauzaun \$2,500 ba arguidu na'in-28,” 12 Jullu 2026. <https://tatoli.tl/2026/07/12/tribunal-aplika-kauzaun-2-500-ba-arguidu-nain-28-ba-kazu-scam-call-centre-ih-manleuna/>
- HATUTAN, “PNTL Sobu Jogu Online iha Rezidência Ida iha Manleuana,” 8 Jullu 2026. <https://www.hatutan.com/2026/07/08/pntl-sobu-jogu-online-ih-rezidencia-ida-ih-manleuana/>
- HATUTAN, “PCIC Detein Tan Suspeitu Jogu Online Na'in-28 husi Xina iha Fomento II,” 14 Jullu 2026. <https://www.hatutan.com/2026/07/14/pcic-detein-tan-suspeitu-jogu-online-nain-28-husi-xina-ih-fomento-ii/>
- HATUTAN, “PNTL Dezmantela Tan Atividade Scam Call Centre iha Comoro ho Ulmera, Detein Xines ho Indonéziu Na'in-90,” 13 Jullu 2026. <https://www.hatutan.com/2026/07/13/pntl-dezmantela-tan-atividade-scam-call-centre-ih-comoro-ho-ulmera-detein-xines-ho-indoneziu-nain-90/>

UNODC (United Nations Office on Drugs and Crime)

- UNODC, “Southeast Asia and the Pacific Organized Crime Threat Alert: Strategic infiltration of vulnerable jurisdictions through criminal foreign direct investments — the case of Timor-Leste,” 11 September 2025. https://www.unodc.org/roseap/uploads/documents/Publications/2025/UNODC_Alert_Strategic_infiltration_of_vulnerable_jurisdictions_through_criminal_foreign_direct_investments.pdf
- UNODC Regional Office for Southeast Asia and the Pacific, “Criminal foreign direct investment threatens Timor-Leste as organized crime targets vulnerable jurisdictions,” 11 September 2025. <https://www.unodc.org/roseap/en/2025/09/timor-leste-organized-crime/story.html>
- UNODC, “#TrappedInScamCrime” regional awareness campaign launch (with International Justice Mission, US Department of State funding), Bangkok, 12 December 2025. <https://www.unodc.org/roseap/en/2025/12/trapped-in-scam-crime/story.html>
- UNODC Regional Office for Southeast Asia and the Pacific, Publications index (list of 2024–2026 reports on Timor-Leste, ASEAN and trafficking for forced criminality). <https://www.unodc.org/roseap/en/resources/publications.html>

OHCHR / UN Human Rights

OHCHR, “UN report details grave abuses against those trafficked into scam centres,” press release, February 2026. <https://www.ohchr.org/en/press-releases/2026/02/un-report-details-grave-abuses-against-those-trafficked-scam-centres>

OHCHR, “A matter of survival: The human cost of cyber scam operations in South-East Asia,” feature story and full report “A Wicked Problem,” February 2026. <https://www.ohchr.org/en/stories/2026/02/matter-survival-human-cost-cyber-scam-operations-south-east-asia>

OHCHR, Joint Statement by the Special Rapporteur on Contemporary Forms of Slavery, the Special Rapporteur on Trafficking in Persons, and the Special Rapporteur on Cambodia: “Immediate Human Rights-Based Action to Tackle Forced Criminality in Southeast Asia Scam Centers,” 19 May 2025. <https://www.ohchr.org/en/press-releases/2025/05/un-experts-urge-immediate-human-rights-based-action-tackle-forced>

UN Geneva (UNOG), “UN report exposes torture, rape in Southeast Asia’s multi-billion-dollar scam centres,” February 2026. <https://www.ungeneva.org/en/news-media/news/2026/02/116099/un-report-exposes-torture-rape-southeast-asias-multi-billion-dollar>

UN News, “UN report exposes torture, rape in Southeast Asia’s multi-billion-dollar scam centres,” 22 February 2026. <https://news.un.org/en/story/2026/02/1167012>

Mídia regional no internacional

Al Jazeera, “UN warns online scam centres hitting Southeast Asia moving to East Timor,” 12 September 2025. <https://www.aljazeera.com/news/2025/9/12/un-warns-online-scam-centres-hitting-southeast-asia-moving-to-east-timor>

OCCRP, “Why Timor-Leste is at Risk of Becoming a Scammers’ Paradise,” joint investigation with Guardian Australia. <https://www.occrp.org/en/feature/explained-why-timor-leste-is-at-risk-of-becoming-a-scammers-paradise>

Inquirer.net / Global Nation (Reuters wire), “UN reports scam centers in Timor-Leste,” 13 September 2025. <https://globalnation.inquirer.net/291442/un-reports-scram-centers-in-timor-leste>

AGB (Asia Gaming Brief), “Timor-Leste’s gaming industry targeted by organized crime, UNODC warns,” 21 September 2025. <https://agbrief.com/news/16/09/2025/organized-crime-infiltrates-timor-leste-gaming/>

Fortune, “‘A national security problem and a homeland security problem’: The world targets Southeast Asia’s notorious scam centers,” 15 November 2025. <https://fortune.com/2025/11/15/southeast-asia-scram-centers-cambodia-myanmar-human-trafficking-cybercrime/>

Forbes, “UN Report Exposes Human Trafficking Behind Southeast Asia Scam Centers,” 21 February 2026. <https://www.forbes.com/sites/steveweisman/2026/02/21/un-report-exposes-human-trafficking-behind-southeast-asia-scram-centers/>

Isle of Man SC News, “UNODC Release: Southeast Asia and the Pacific Organised Crime Threat Alert — Timor-Leste Case Study,” 8 October 2025. <https://www.isleofmangsc.com/gambling/gsc-gambling-news/08-october-2025-unodc-release-southeast-asia-and-the-pacific-organised-crime-threat-alert-timor-leste-case-study/>